



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0027109 25
Sarajevo, 08.07.2025. godine

Na temelju člana 35. stav 2. tačka e), te člana 216. stav 3. Zakona o kaznenom postupku Bosne i Hercegovine, donosim

NAREDBU
O NEPROVOĐENJU ISTRAGE

U vezi mail-a pod nazivom „Prijava govora mržnje na društvenoj mreži Facebook“, poslanog sa mail adrese ... na zvaničnu mail adresu Tužiteljstva, dana 09.06.2025. godine, i u prilogu dostavljenog screenshot-a komentara na društvenoj mreži Facebook, te eventualnog počinjenja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH, iz razloga što je iz prijave i pratećih spisa očigledno da prijavljeno djelo nije kazneno djelo.

O B R A Z L O Ž E N J E

Tužiteljstvo Bosne i Hercegovine je, dana 09.06.2025. godine, na zvaničnu mail adresu Tužiteljstva ..., zaprimilo mail pod nazivom „Prijava govora mržnje na društvenoj mreži Facebook“, poslat sa mail adrese ..., u kojem je kao prilog dostavljen screenshot komentara na društvenoj mreži Facebook, sadržaja: „Venya Wolf haha Hitler was the best“, ostavljen od strane korisnika Facebook profila ...

U zaprimljenom mail-u je navedeno da predmetni sporni komentar predstavlja veličanje nacizma i uvredu za žrtve nacističkog režima, te da njegov sadržaj predstavlja govor mržnje i javno poticanje na nasilje i netrpeljivost.

Kazneni zakon BiH ne sadrži direktnu odredbu kojom bi se inkriminiralo veličanje nacizma ili Adolfa Hitlera, osim ako je takvo ponašanje povezano sa izazivanjem mržnje, razdora ili netrpeljivosti među konstitutivnim narodima i ostalima ili sa odobravanjem, poricanjem, grubim umanjivanjem ili pokušajem opravdanja zločina genocida, zločina protiv čovječnosti i ratnih zločina u specifičnom kontekstu koji se odnosi na pravosnažno presuđene zločine, što bi u tom slučaju upućivalo na eventualno počinjenje kaznenog djela Izazivanje nacionalne, rasne i vjerske mržnje, razdora i netrpeljivosti, propisanog u članu 145a. Kaznenog zakona BiH.

Izjava poput „Hitler was the best“, odnosno, „Hitler je bio najbolji“, iako moralno, historijski i društveno sporna, ne predstavlja kazneno djelo prema Kaznenom zakonu BiH jer u konkretnom slučaju nije izjavljena u kontekstu govora mržnje ili negiranja zločina genocida, zločina protiv čovječnosti i ratnih zločina, niti ista sadrži eksplicitne elemente izazivanja ili podsticanja na nasilje ili mržnju prema određenim grupama osoba ili članu grupe određene s obzirom na rasu, boju kože, vjeroispovijest, porijeklo ili nacionalnu ili etničku pripadnost, već izražava neargumentovanu i kontroverznu ličnu tvrdnju pojedinca.

Shodno navedenom, nakon analize sadržaja spornog komentara, te razmatranja mogućnosti postojanja elemenata bića kaznenog djela propisanog članom 145a. Kaznenog zakona BiH, kao i drugih relevantnih kaznenih djela propisanih važećim kaznenim zakonodavstvom Bosne i Hercegovine, cijenimo da sadržaj komentara ne ispunjava zakonske pretpostavke niti jednog od kaznenih djela Kaznenog zakona BiH, zbog čega je Tužiteljstvo Bosne i Hercegovine, na temelju člana 216. stav 3. Zakona o kaznenom postupku BiH, iz razloga jer je iz prijave i pratećih spisa očigledno da prijavljeno djelo nije kazneno djelo, donijelo Naredbu o neprovođenju istrage.

Sukladno članu 216. stav 4. Zakona o kaznenom postupku BiH, Tužiteljstvo Bosne i Hercegovine će u Zakonom propisanom roku obavijestiti podnositelja prijave o donošenju ove Naredbe i o mogućnosti ulaganja pritužbe protiv iste Uredu tužitelja, u roku od 8 (osam) dana od dana zaprimanja Obavijesti.

**TUŽITELJSTVO/TUŽILAŠTVO BiH
TUŽITELJ**